


# NSU NA MULUKU

## MAHIKU ALA OOKISERYA

 V'ekeekhai mureerelo othhikela-tho eriyari y'atthu ala a oSpaanya vaasisu ula. Nto miyo nkinsuwela sinto Jim onookaravari yela. Oh, owo onnikaravari. Miyo nlelo kinnisuka ekravasao yeyo nikhuru na alipa-owipa namukhani n'oSpaanya naapakaly'aya okathi wary'aka wenna khalai ni Munna Garcia. Nto miyo kooliyala esipo ele yamukhani yakiipelak'aya. Masi, oh, moota yaakisivel'aya yeyo! Nto axinamwane ale othene vano t'owunnuwasa ni oothela ni otheliwa. Miyo kinniwiwasa yawo vano n'ukathi ule. Nto miyo koovolowa vaasisu ula kimona Yosefe mwamukhani, nto vano eyo ennihimya etthu yinci-ene wa miyo, nto miyo v'ekeekhai kaahitteliwa murima vanci-ne owoonani.

<sup>2</sup> Nto, vano, miyo kokhalana nolumo nimosa miyo kinwery'aka ohimya ni nntaava n'oSpaanya. Nyuwo mwaanitthuna wiwa neno? "Aleluya!" Miyo nkinkhalakhala kiliyalaka nolumo nno. Emara emosa miyo keererya omukhalaha muthiyana mmosa oohiwa okiwelela miyo. Vano, miyo poti ohimya nna vovonyeya, nyuwo moone, masi vooreera sinuupuwela'aka naari "oye." Eyo yoolikana? *Mukiwe* miyo. *Mwiwe*, "oye." Nto vo nkinkhalakhala kiliyalaka, "Gloria a Dios!" Vooreeraxa! Oh, miyo kaahikhalana okathi w'okhala epoma yuulupale, Epoma y'oMexico, olavula ni yawo weiwe. Moota kaary'aka ootteliwa murima! Nto miyo kaani . . .

<sup>3</sup> Miyo kaari oFilandia vaamanly'aka okhala va. Nto okathi wothene miyo kinnupuwela okathi waalavunly'aka ni mwamuthiyana mmosa a oFilandia. Awo yaahikikuxa mpakha vale awo aniihana'aya "petaniya." Khula elapo yookhalana muupuwelo aya. (Ki, nyuwo munnimwiwa namalwe, miyo nkirere wattamela yowo? Munniwerya wiwa orattene? Ti yeyo.) Mwamuthiyana ola, owo aari mutthu oophenteya. Masi owo aari ntoko miyo, waanimusivela olavula vanci-ene. Nto mulipa-otaphulela . . . owo aanilavula vowakuvaxa, nto—nto mulipa-otaphulela khaawerya ohimya vowakuva sintoko owo saahimy'awe. Ni owo aaneemela ni witho wawe onakhala woxerya, owo khwira, "Miyo kikunxe ela n'amiravo ale oPapilooniya."

<sup>4</sup> Masi, nyuwo mosuwela, miyo kinnoonaka wira othene a—axipalame othene anipa ni Enkelesi, alapwa anikhuwela ni Enkelesi, axinamwane aninla ni Enkelesi. Miyo kinnixanka exeni enikhumelela ni hiyo mwa khula enamuna. Masi khula

mmosa wa hiyo onuupuwela wira nnta—nttava nahu ninrowa okhala nntava n'oMilenio, v'ekeekhai. Masi hiyo ale naakhenle Eroho Yowarya, eyo ekeekhai, 'okhala wira hiyo nrina nntaava na Wirimu.

<sup>5</sup> Hiyo nihana Munna Rowe va ni hiyo vaasisu ula, Tiplomata onikhuma oWashington. Miyo kookupali wira oorumeela vathi va maPresidente athanu wala athanu na mosa, maPresidente athanu n'anli. Ni nyuwo mosuwela moota miyo sinon'aka wemela va, vaplataforma va, olavula, ni mulopwana ntoko owo akilanthi-ene ottuli waka. Masi onamoon'awe okathi wothene waari mulupale wa miyo, ni vanci-enexa okathi owo. . . Miyo kookupali wira owo aari Luterano, kaahivonyeru, wala muKatolika ahiso Luterano, Luterano. Nto aahimiyaka wira owo. . . etthu emosa ntoko opuruleya muhina mwa ehema vamuthukumanoni wa Pentekosite, nto owo khuyenya. . . Vookiserya owo khutthara ephiro mpakha waltari, ni, okathi viiraly'awe, Apwiya khumukhuruwela khimureeriha vanci-ene mpakha. . . Miyo kinona wira owo onniwerya olavula mattaava oophiyaka mathanu na manli oovirikana. Ni owo ohimnye wira aahererya nimos, "khuhivara etthu," vano kweererya nikina, "khuhivara etthu." Nto miyo kinona wira owo onniwerya olavula Espaanya sintoko nyuwo othene muniwery'anyu. Vano owo—owo oheererya othene, nave awo khavanre etthu. Nto, moone, mosuwela, Muluku aahimureerela murima, mpakha Owo okhuruwa khunvaha nntaava owo ahatonko awe wehererya khalai, khwira, "Nno ninnivara etthu!" Eyo ekeekhai. Miyo kinona wira eyo enamuna enrowa'aya okhala epantte ekina.

<sup>6</sup> Miyupuxeryo sinci-ene kirina'aka mmurimani mwaka wa ekereya yamukhani, miyo kokupali wira eyo. . . oh, miyo koliyala vatthu vary'aya. Eri nipuro nimos, va vakhiviru ni Ephiro Tonto. Ni miyo kinnuupuwela yeyo. Miyo kinnuupuwela nolumo "Ephiro Tonto," vavo ekereya Apostolika y'oSpaanya vaary'aya.

<sup>7</sup> Miyo kaamuhimeerya pastore, "Nna naamukhala nipuro nulupale wira okhale muhakalaliho," opuro munci-ene, ekereja esya, atthu ooreera murima. Vano miyo kinona wira yaamukhala orattene okhalana muhakalaliho nihiku nimos. Mulompele yeyo, orwa okhalana muhakalaliho. Vano, miyo kinwehererya wira enookhala otthikela wa ele hiyo naarin'ahu ekereya ekina. Miyo kinnuupuwela kemenlene vapuwani, kiphitenrye-ene ekintali, keettaka nno ni nno mphironi, keererya olaiha ohiyu omosa, eyo v'ekeekhai yaari y'otteeliha murima kihinkhalakhal'aka kilayalaka. Nto miyo kokhalana e—ekaravasao ya aximwali, axirusi ni axinna yawo yiipale khukaravari. Awo yaanehererya wipa "Only Believe," nave khayawerya wipa sana, nyuwo mosuwela. Awo yaaniira, nipuro na "only believe," yaakhuma etthu ntoko "yeonea believe," moone.

<sup>8</sup> Nto miyo kinnimupuwela Rebekah, mwan'aka, Sarah, nto awo nlelo yiira, "Papa, mwiipe, murumihe ekaravasau ile yamukhani ya . . ." Ohiya wira "y'oSpaanya," awo khayawerya ohimya nulumo nno, yira, "axirusi Spinac, axirusi Spinac yiipaka 'Wamini Pahi.'"

<sup>9</sup> Vano, miyo kinnuupuwela wira awo yahitthara muthukumano. Muhakalaliho waamwiiraneya nto, ni awo yahitthara muthukumano mpakha Olimani Onikela nsuwa. Nto miyo . . . etthu yamukhani yahivara murim'aka okathi hiyo okhumaly'ahu oCalifornia, Munna Moore ni miyo, ni Munna Brown, okapitolio. Nto okathi miyo oviraly'aka emp'ele ohiyu ule, anamwane ale yeemenlene vale yiipaka wira, "Owo onimookhapelelani." Nyuwo munniwaka yeyo. "M'owaryani mwa nsuwa wala mw'epiphini, Owo onimookhapelelani." Imara sinci-ene ilapo s'okhopela, mmapuwani m'owana ikhotto sa m'olumwekuni, keereryaka oruha Mutthaka wa Kristu, kaaniwuupuwela axirusi n'amiravo ale akiipelaka esipo yeyo miyo, "Owo onimookhapelelani. M'owaryani mwa nsuwa wala mw'epiphini, Owo nlelo onimookhapelelani." Vano eyo ennikhhalaka muupuxeryo muulupale, mukhaliheryo.

<sup>10</sup> Kikumanaka ni pastore anyu oorera murima, nto kinnitthapa vanci-ene wona wira ekereja eri ekumi ni wira nyuwo moophwanya emp'ela yulupale yooreera va, anikilaathi athu othene, ni opuro munci-ene wo opweha-vo mikukutta. V'eekkehai nipuro nooreera mmatatani mwa Eroho Yowarya, hiyo naweryaru pahi omoonihana Yowo ni omusuweliha wira hiyo ninthuna muhakalaliho. Owo, miyo kokupali wira Owo onoonivaha.

<sup>11</sup> Vano, ohiyu ula hiyo ninrowa okhala mukerexa wa Munna Outlaw, ekerexa ya Nsina na Yesu, epantte ele ekina. Nto Munna Outlaw, miyo kinnaamini e . . . ekerexa Apostolika, nave. Miyo kinona wira owo oniihana nsina nawe pahi, ekereja, Nsina na Yesu. Miyo kinona wira owo ta etini apostolika. Nto siso hiyo ninrowa okhala weiwo ohiyu ula. Nto vano hiyo khannihimya wira ekerexa y'oSpaanya, "vano murowe weiwe," okhala wira nyuwo muri vamutekoni vanyu. Nto vo onoorowa okhala muthukumano muulupale wa Alipa a Nakoso a aKristu, opacerya Namathanu, vamaalakarumala mitoko ikerexa sikina, Namathanu. Nto muthukumano ola, awo anrowa okhalana alipa-olavula oosuweliwa, vano Oral Roberts, ni munna mukina Metotista yowo omanle woopowa, nto athu anihimya wira owo mulipa-olavula a ikuru. Nto miyo kookupali wira nyuwo munosiveliwa ni muthukumano iya. Ni nyuwo aximiravo, awo aakhalana muthukumano iwe wa amiravo nave, ntoko munna simanly'awe ohimya. Miyo kinimwaroiha an'aka weiwo wira awo akele memmo. Nto siso vano murwe, hiyo nnoosiveliwa okhala ni nyuwo. Apwiyaya yooreeriheni nyuwo othene.

<sup>12</sup> Nto vano kintthuna kikhunle mBiibiliyani kisome mamosa mamosa wa Masu Awe oreerihiwa. Nto miyo koothanla vaasisu ula, mwa okathi vakhani pahi, miyo nkinthuna wookhalihani okathi munci-ene, sosoma kamosa kamosa, nto emosa wa seiyo emphwanyaneya mwa Samuweli Oopacerya, ekina emphwanyaneya mwa Yesaya. Nto kaatthuna kisome mwa Yesaya toko. Nto miyo . . .

<sup>13</sup> Munniwerya wiwa orattene, mapuro othene? Muhina mwa miikoro iya, sinikhala ntoko sowiiwanyeya ni miyo, nkinsuwela mwaha wa xeni. Nyuwo munniwa oratteene iwo, muvenxe matat'anyu. Vaareera, vaareera.

<sup>14</sup> Vano, miyo koolala vammilo vakhani, v'ekeekhai, eyo mwaha wo olavula vanci-ene. Nto okhuma okathi waary'aka weno n'axinna ala a oSpaanya, mwa iyakha soophiyaka muloko ni thanu na mosa sivinre, miyo kookupali, khino mwa iyakha soophiyaka muloko ni thanu na mosa wala muloko ni thanu na pili sivinre, ahe, miyo kinoolaleya opacerya okathi yole. Vano miyo kaahikhulumuwa okathi ule, miyo kaahihimya, nto nlelo kookhulumuwa, masi nlelo kinoorowa ni mahala a Muluku.

<sup>15</sup> Vano nrowe nikhunle mwa Yesaya 40, ekapitulu 40 ya Yesaya; nto ekapitulu 1, wala ekapitulu 3 ya Samuweli Oopacerya. Nto nivarenle-ene mapuro awo wira nisome Masu, miyo kaatthuna vano wira nuuramihe miru sahu okathi vakhani wira nilompe.

<sup>16</sup> Tith'ihu a Wirimu, hiyo ninnixukhuru olelo mwaha wa oreeriwa nno wo okhala emp'ela yooreeraxa evahereriwe wa Muluku wira evariliwe muteko Awe. Nto ntoko sinsuwel'ahu wira arumeyi Anyu anneemela withela wa plataforma ela ahiso epulpitu imara sinci-ene, ni makhalelo oovahereriwa muteko Anyu.

<sup>17</sup> Ni wira *ela*, vaasisu ula, eniruuha miyupuxero, miyupuxero wa muhakalaliho waamalaru opacerya, ni Eroho Yowarya yeyo yaakhurunwe mwa mukhalelo wa Warya wuulupale, ntoko Nlumi na Moro, nto Eyo khulavula wira Mutthaka waamukwesa elapo. Nto vano olelo owo wahalaa. Mutthaka onnivarela moro eriyari ya axilopwana aalupale, numala wona Yola, ntoko Oral Roberts ni Tommy Osborn, ni Tommy Hicks ni anci-ene akina. Nto ni ikuru hiyo nnitakanih'ahu, hiyo ninnoona wira Mutthaka onniruuha moro wa muhakalaliho mwa khula elapo vathi v'Erimu, wa Mutthaka wa pentekosite. Wa yela hiyo ninnixukhuru ni ninnoovuwihani Nyuwo, O Muluku a Ikuru.

<sup>18</sup> Nto vano olelo hiyo ninvekela wira Nyuwo murehererye murim'ahu, wira okhale woolikana wa Okuxiwa wuulupale yowo onrowa wiraneya vahilokenle, hiyo ninnaamini. Nto mirima sahu saahikhale sana wa yeyo wala etthu ekina tho Nyuwo murin'anyu wira ekhale yawihu, hiyo ninnoovekelani wira Nyuwo munlevelele mwaha w'ovonya wahu, ni mulavule ni hiyo olelo mwa Masu Anyu. Mmureerihe pastore a ekerexa ela,

matiyakono aya, akhapeleli a musurukhu, n'atthu othene, aniira mpantta. Mureerihe nikhuru n'alipa-owipa nna namukhani, ni alipa anopa epiano, alipa-owipa. Othene vamosa, mwaareerihe ale anivolowa mikhora sa nipuro nna. Wira awo akhume oorukunuxiwa khula okathi, vakhiviruxa ni Nyuwo ovikana saary'aya okathi yaavolow'aya. Munivahe, Tithi. Ni wira ekhale siso, hata vaasiisu ula, maana hiyo ninvekela mwa Nsina na Yesu. Amen.

<sup>19</sup> Vano nikhunle Eliviru ya Yesaya, ekapitulu 40, nisome.

*Mwaakurunuxe murima, mwaakurunuxe murima atthu aka, onihimya . . . Muluku.*

*Mwaalavulele molumo ooririha murima atthu oYerusalemu, mwaalaleerye wira, ohawa waya woomala, soottheke saya sooleveleliwa: tthiri awo ahaakhela vana vanli mwa ntata n'APWIYA mwaha wa . . . itampi saya.*

*Nsu na mutthu onikhuwela mothakoni, Mulokiherye ephiro y'APWIYA, mookolele mwemmo muhinkhaliwa ephiro ya Muluku ahu.*

*Mikoti sothene sinoovenxiwa, ni miyako ni matumuxa anoopwexakasiwa: mapuro oowalakakha animwaataleliwa, ikuluttu sinoolikanyihiwa:*

*Vano ovuwa w'APWIYA onoosuwelihiwa, nto atthu othene anrowa wona vamosa: tthiri eyano y'APWIYA t'elavunle siso.*

Vano muLivuruni mwa Samuweli, Samuweli Oopacerya, ekapitulu 3, kintthuna kisome iversikulu 1, 2, 19:

*Vano mmiravo Samuweli aanaarumeela APWIYA eettihiwaka ni Eli. Nto molumo a APWIYA yaari oorika mahiku awo; khayakhanle yowona yaakhumelela.*

*Vano yaahiraneya okathi uwo, okathi Eli arupathale-ene nipuro nawe, maitho awe yahipacerya omuripeliha, owo khaawerya wona;*

*. . . muthuko wa Muluku ohinatthi ottipha mpani mw'APWIYA, mwemmo nivuku na Muluku mwaaryaya-mo, ni Samuweli arupaathiki;*

*Nto APWIYA yaahimwihana . . . vano owo ahaakhula, miyo kiri Va.*

Versikulu 19:

*Vano Samuweli aahinnuwa, nto APWIYA yaari n'uwo, n'Awo khayahin'ye hata nimoso wa molumo aya omorela vathi.*

<sup>20</sup> Oh, eyo yaamukhala yosoma yoophiyerya wira nilavule va mweri mmosa, ni naamuwerya okumiha-mo s'ohimya sinci-ene mwa yosoma ela y'ovuwa. Masi vaasiisu ula, ni hiyo nrina minutu

soophiyaka miloko mili pahi wira nikhume okathi onthhunya wa yawihu. . . Miyo kinona wira exikola ya Ttiminku yoomala wala khino entthara yela, miyo nkisuwenle. Masi, ohiya vo, miyo kintthuna kikuxe yosoma ya, *Nsu Na Muluku Mahiku Ala Ookiserya*.

<sup>21</sup> Ola okathi woosuwanyeyaxa. Hiyo ninnona wira vatthu vanlavul'ahu mwa Solempwa, wira ehimnye wira, "Khayakhanle yowona yaakhumelela mahiku a Samuweli." Tivo, "Vatthu vahikhanle-vo yowona," Biibiliya ohimnye wira, "atthu anoopweteya." Hiyo nihana okhalana yowona. Nto sowona sinaarweela maprofeta, nto awo Masu a Apwiya anihimeeriwa yawo.

<sup>22</sup> Nto hiyo ninniphwanya wira Eli khaari profeta, Eli aari namukuttho. Nto owo aahipacerya wuluvala, ni maitho awe yaahipacerya oriipela, ni owo khaawerya wona wira eettakaseke, aari mulopwana mmosa muulupale ni oolemela. Ni owo aahipacerya ohiya ovara muteko w'Apwiya.

<sup>23</sup> Nto eyo etthu emosa ntoko siriyaya olelo. Miyo kinona wira ekerexa, mitthenkeso ni miromolelo, sookhala vapuwani okathi munci-ene, ni soopacerya okhala sootteettheya. Nto muteko w'Apwiya onikhala w'ohivariwa, Masu a Ekeekhai, okhala wira ekerexa, mmansaya, enkhala yoohoona sana. Vano hiyo nintthuna, olelo, Nsu na Muluku wira nilavule eriyari ahu, wira nnihokoloxe.

<sup>24</sup> Nto, moone, Eli aahirupathi, ni e. . . wona wawe waanivonya. Owo aari namukuttho. Nto awo khayarina yowona yaakhumelela ekhumaka w'Apwiya. Ni moota yaatthuneyaya!

<sup>25</sup> Nto Muluku aahihimya wira aamuvaha yaatthuneya okathi uwo. Owo okathi wothene oniira siso. Nto hiyo ninnitthuna Nsu na Muluku olelo, wira nnivahe entthuneya y'okathi, wira nisuwele okathi hiyo nnikhal'ahu. Vano Owo vanilaihenry'awe yeyo, hiyo nnoowerya okhala oororomela wira Owo onomusuka natiri Awe. Eyo p'uroromela mulipa-owamini orin'awe mwa Mpattux'awe, wira Owo oohimya ovaha entthuneya.

<sup>26</sup> Nto, olelo, niwoko na ekereja okhala mwa mukhalelo eryayamo, okhala wira aakhala masu manci-ene, masu manci-ene makina wira akhumihe ekerexa mwa Nsu na Muluku, mpakha vahinkhupaleyaya wira anci-ene animwiiwa Nsu na Muluku nnamwi Nno nilavulaka eriyar'aya. Awo alaleka khayarowa wiwa sana Nenno, okhala wira naamukhala etthu yootikiniha wa yawo. Awo anniithukumanya mmansaya vanci-ene mwa masu a nihiku!

<sup>27</sup> Nto hiyo naweha, mwa osoma wahu wa Solempwa, wira Nsu na Muluku naari nootikiniha wa yawo.

<sup>28</sup> Nto eyo yookhala-tho enamuna yeyo olelo, wira Nsu na Muluku. . . Aakhala masu manci-ene makina. Nto yakhala wira Muluku aahihimya wira Owo aamunivaha Nenno, nto masu

makina yakhalaru oovirikana ni Nsu na Muluku, weso nihana okhala nsu na nwanan'ihu, wira nnitapanye hiyo, wira hiyo nihiiwe sana Nsu na Muluku okathi Nno ninlavul'aya.

<sup>29</sup> Nto hiyo ninnoona wira eyo yaari etthu emosa yoolattana n'ile ni Eli ni Samuweli, masi Eli aahisuwela naananoru wira aari Muluku. Nto nne naari khuluwiru nru—nruwano wa Eli. Okhala wira, Nsu na Muluku, nilavulaka ni Samuweli, naahimuleela itthu sowira soovonyeya sa Eli, mana owo aahaalemeiha an'awe, nto awo yaakuxa musurukhu ni—ni enama mwa soovahiwa. Eyo khayari yooreera. Nto awo yiira itthu sootakhala, soovirikana ni Masu a Muluku.

<sup>30</sup> Nto Samuweli ahikhalana...etthu emosa Samuweli aawerya'awe wira, waari olavula v'ekeekhai. Nto owo aanoova vakhani wira siso, okhala wira eyo yaari yoovirikana ni nipuro nenno owo aaroihiwe awe wira aleliwe, Eli ni mpani mwa muluku. Masi Eli khwira, "Mulavule." Munnona? Nto owo aahimuhimeerya v'ekeekhai etthu yaarowa okhumelela, wira Samuweli...wala, "Nihiku n'Elu naahimala, ntoko namukuttho," okhala wira Muluku aahilavula, nto Muluku aaveleeliha Mutthak'Awu mwa profeta Samuweli. Oyariwa wootikiniha vanci-ene, oovahereriwa wa Muluku opacerya enamwane. Muluku aalavunle ni yowo, ntoko mwanamwane, ni aamutthokiha yowo mwaha wa muteko waarwa oholo. Nto okathi wa Eli waammala.

<sup>31</sup> Aakhala masu manci-ene mulaponi olelo, eyo v'ekeekhai etthu yolipa, okhala wira ennivololiha Nsu na Muwerya Sothene. Aakhala masu manci-ene oosoma, masu malupale a athu oowerya yawo ari oosoma, yawo, mwa mikhalelo saya s'osoma, mpakha annittikinya mittetthe. Awo khahi pahi athu a ohiyu wothene, masi awo annittikinya mittetthe, atakanihaka mitthenkeso suulupale, ikampanya suulupale, v'othapuluwa. Nto mutthu aamukhala ootikinihiwa vakhani. Eyo ti yoophiyerya wira yaatikinihe, wa mota itthu iya sinrow'aya ni wunnuwa. Ni aakhala masu an—anvenya ni wira itthu iya, nto eyo enniiriha Nsu na Muluku okhalihwa ottuli nipuro nno, Nsu na Muluku n'ekeekhai.

<sup>32</sup> "Nto Nsu na Muluku," awo anira, "ninrowa osuwela sai wira nno nsu na Muluku?" Okhala wira, mwa olelo...Okathi ule naari mwa profeta oolipihiriwa. Vano, olelo, mota ninsuwel'ahu wira nno nsu na Muluku, okhala wira woonihiriwa wa Nsu na profeta. *Ola* profeta a Muluku. Nto Nsu n'ekeekhai na Muluku nnimuhokoloxa pahi Muluku yole Oowerya Sothene, a ekeekhai, mukumi, ni Masu Awu Oowerya sothene, ni woniherya W'owerya sothene wa Masu a Ekeekhai. Nto hiyo nnoosuwela wira Nno nsu na Muluku. Okhala wira, ni Oowerya... Aakhala manci-ene makina a mukhalelo mukina, anihala ovololiha Nenno. Masi, mupuwele, Nno nnimwaarya, Nno nnookhuma! Nno nnimwira.

<sup>33</sup> Vano, nookhala nsu olelo m'olumwenkuni wa ipolitika. Nno nsu nuulupale. Nto atthu, vekeekhai, mwa nihiku nna nuulupale na ipolitika, awo ano. . . Sothene ti sootapanyeya mukerexa mwaya ni itthu sothene. Nto imara sinci-ene, wira hiyo sinon'ahu naanano, wira nsu na ipolitika mahiku ala ti na ikuru ovikana Nsu na Muluku mukerexa, ahiso atthu a w'Amerika khayakhalakhala yiiraka etthu amanly'aya wira. Munnona? Awo khayakhalakhala yiiraka yeyo. Nsu na Muluku naakhalihwera nikumi mukerexa, awo khayakhalakhala yiiraka soovonyeya iye. Masi nsu na politika ti nootepaxa okhalana ikuru mulaponi olelo ovikana Nsu na Muluku, mpakha atthu aathumiha eyuulupale aya y'oKristu mwaha wa mutakanxeryo w'osuweliwa, osoma, ni ikuru sa politika. Eyo etthu y'owuliha muru wona. Etthu-ene yeyo elipiheryaniwe elapo ahu, etthu elipiheryaniw'aya, atthu aarukunuwa khurerya etuli khu—khuhanla etthu yeyo hiyo ethyanw'ahu elapo ekina. Nto e—Plymouth Rock, ni *Mayflower* n'akina, yaariwe nno khu—kukhalaha muhakhu ula muulupale hiyo nrin'ahu. Etthu emosa yeyo hiyo ewann'ahu vancipale wira nikhume-mo, hiyo nihihela tho munikwarikhwani mwaya, okhala wira Biibiliya onihimya wira yaarowa okhala siso.

<sup>34</sup> Nto eyettiheryo ya Eli: namukuttho ohiya profeta. Profeta ti Masu. Nto namukuttho aari ekerexa.

<sup>35</sup> Nto yoophiyerya nipuro mpakha vapacenryaya okhala yoolula mpakha Masu anikhal'aya owaatikiniha atthu. Awo khanaakhela. Nto nyuwo poti olavula Yawo, nave atthu khaniwa, okhala wira awo khayixuttihiwe mwa Yawo. Paulo ohimye wira, “Nlope narumiha nsu noohisuwanyeya, t'ani onrowa osuwela wiilikanyiherya ekhotto?”

<sup>36</sup> Atthu yiixuttihiwe wira yiwe n—n—nsu na ekerexa, nlope na ekerexa, “Hiyo nookhalana anci-ene muxikola mwahu ya Ttiminku ovikana akina sirin'aya.” Eyo khenihimya hat'etthu. “Hiyo nookhalana anci-ene mmuromoleloni mwahu ovikana akina sirin'aya. Hiyo nri aalupalexa eriyari sa miromolelo.” Moone, owo ti muthinto wa nsu atthu yiixuttihiw'aya. Mphironi, awo anoookhuma orowa waakuxa atthu ni waakeliha. Imara ikonto muloko sa ikonto mukampanyani yuulupale, animwaaruuha. Awo anicaliwa ni exeni? “Hiyo nrina ekereja yuulupalexa. Hiyo nrina muthukumano muulupalexa. Hiyo nrina exikola ya Ttiminku yoomalela waatta atthu. Hiyo nrina mukhulupale a mpoma onirwa mukereja mwahu.” Sothene iyo poti okhala orattene, masi ekereja-ene yeyo yaahikhale yowiixuttihiwa Nsu na Muluku, Nlope na Ehapari yoorera, mureerelo xeni eniir'aya?

<sup>37</sup> Nto etthu yaavenyaka ntoko siso sivenny'aya eriyari ya kuvernu ahu, exeni ekhumelenle? Ekerexa khesuwenle Nsu na Nlope, ni awo khayaasuwela etthu yowiira. Natiri muulupale a oruwerya, mutthu muulupale oosomaxa arwaka, nto awo



aronwe vasulu v'etthu yeyo Biibilia aahimmy'awe, khiruuha-mo. Moone, nsu na politika! Nto nno nihooniherya wira nivinre vasulu na Nsu na etini, weso awo khayaakhalakhala yiiraka etthu yiiraly'aya, Nsu na Ehapari yooreera. Okhala wira hiyo noolaiheriwa itthu sinci-ene, hiyo noolaiheriwa oruwerya, nto khivananyiherya wira hiyo nnookhalana.

<sup>38</sup> Masi, nlelo, eyo khenihimya hat'etthu wa mutthu-owaamini. Mukhunle Elivuru ya aHeperi, kapitulu 11, mmuwiriyane Paulo Owarya owo olavula, moota awo, mahiku, "Yeettas'aya musapalani sa ipwittipwitthi ni isapala sa ipuri, yaari owoomoliwa, wohikhalana nipuro, khayawerya okela mpoma."

<sup>39</sup> Miyo kaasoma mwa Muthukumano w'oNicea, okathi miyaha saakhumelenly'aya oNicea, oRoma, iyakha imiya ttharu numala okhwa wa Kristu, mwa Muthukumano muulupale w'oNicea, okathi ekerexa yuulupale yaary'aya yolipa n'ile yaari yekeekhai, awo yaanimutthuna Biibilia. Ni alipa-orukunuxa murima a aRoma a ekereja yoopacerya y'oRoma yaahenly'aya-mo makano, wira, mwa ethonyeryo, ntoko sirin'ahu Natale.

<sup>40</sup> Natale, Kristu khanayariwe-tho nihiku na namiloko mili ni mathanu a—a Dezembro ntoko miyo. Vano, mattumuxa o'Yuteya yaarina etthapwe, nto Owo. . .Eyo ennivirikanyiha sothene sikina saahimmwe ni maprofa mBiibiliani. Owo oyariwe okathi w'ephovo, ntoko amwapwittipwitthi othene aniyariw'aya. Owo aayareliweni munikhomani ohiya oyariwa mpani? Owo aari Mwapwittipwitthi. Owo ahaatthyawenly'awe waltari wala w'altari Wawe vavo Owo aakhomeliw'awe, mwikimanyo? Owo aaroihiwe vamwikimanyo. Nyuwo muniroiha ipwittipwitthi oniiviwa inama. Owo aari Mwapwittipwitthi. Vano Owo aayariwe okathi ipwittipwitthi saayariw'aya.

<sup>41</sup> Masi, nyuwo moone, wira yiire siso, awo yaarina otthapela wa iyakha sa muluku-nsuwa, yeyo, mwa eyettelo ya nsuwa, nsu—nsuwa mwa mahiku mathanu opacerya mahiku miloko mili a Dezembro mpakha miloko mili ni mathanu a Dezembro, khokhanle nakhala wetta, wa nsuwa. Nno—nno nnivirikana vakhani khula nihiku, ninrowa neettaka ni neetaka ni neetaka mpakha ophiya nihiku noolekelaxa mweri wa Julho. Nto vo, Dezembro, nihiku naya nowaakuvaxa. Nto vo okathi vakhani yowo wa miloko mili ni mathanu, opacerya mahiku miloko mili mpakha miloko mili ni mathanu, awo yaarina ecirku y'oRoma ni otthapela wa iyakha sa muluku-nsuwa. Vano nto Yupitero, yowo aari muluku a oRoma, nto vo awo khukeliha-mo, yiiraka nto, "Ninrowa omukuxa Mwana a Muluku ni otthapela wa iyakha sa muluku-nsuwa, nitakanxe vamosa wira nikhale niira nuulupale." Eyo ti yoovirikana! Ni, oh, itthu sinci-ene awo ahenly'aya memmo!

<sup>42</sup> Nto vo okathi axilopwana ale a ekeekhai a Muluku yaatthun'aya okhala ni Masu, ntoko Policarpo, Irinewu, Martin,

axilopwana ale, aalupale, a khalai, masantu yawo yaatthuna okhala ni Ekeekhai. . . Nto okathi awo yaaruuhaly'aya mpakha Muthukumano w'oNicea, akina w'atthu awo yaahikoottiwa vancipale mpakha maprofeta orwa akhumaka mothakoni ahirina hat'etthu mwa yawo yohikhala epante ya esapala y'epwittipwitthi, wira akilaathi muthukumano yole. Masi awo yaanisuwela Masu a Apwiya. Masi osuweliwa, mahiku ale muloko ni mathanu a politika y'oyehi ephome, nave khuhicali Yeyo. Vano saahikhala iyakha ikonto-sene wa okathi w'epiphi, moone.

43 Masi Muluku aahihimya wira Nlope nne naamuruma-tho. Okathi wothene atthu aniiwa Nsu na Masu n'ekeekhai, okathi wothene mutthokelele sana etthu nyuwo muniir'anyu ni Masu.

44 Nsu na ipolitika. Nto hiyo w'Amerika ni elapo ekina, nookhalana nsu ninruma vancipale olelo, nto nno ti nsu na Hollywood. Nno noovara olumwenku. Mmuhiye mutthu onikhuma oHollywood n'itthu, nyuwo munoophwanya eyo elapo yothene. Vano, hiyo ninnoona wira awo aakhaliha ettharihelo y'axithiyana ahu, mawarelo aya, moota w'okhaliha maihi aya. Awo aaruuha mawarelo yawo.

45 Ekereja yaahaana osuwela Nsu na Nlope na Muluku mwa yeyo! Masi wookhala otapaneyeya munci-ene okhala wira nyuwo muniwoona akina yiiraka siso, ithonyeryo. Muhikkhalakhale muttharihelaka ethonyeryo yeyo, okhala wira eyo ti yoopweteya. Okathi wothene mwiiwelele Nsu na Muluku, etthu Owo onihimya'awe mwaha wa yeyo.

46 Nto vo hiyo ninnoona, oHollywood, awo annipaka itthu. Nto mukihye pahi kilavule yela nihinatthi orowa oholo. Yaahikhala e—etthu yaakhumme khahi khalai, wira mu—mulopwana mmosa oHollywood. . . Nkirina hata nthowa ni mulopwan'ola vano, owo mutthu onokhwa yowo Kristu omukhwenly'awe, masi wira kiwooniheni pahi. Awo yaahipaka etthu emosa yamukhani eniihaniwa, axinamwane yiiraka, yiihanaka “hula-hoop,” hula-hoop, wala etthu. Nto nyuwo mwawenhe-ene ethiru ni itthu entthara yeyo, etthu, mwa axinamwane. Eyo khahi yooloka.

47 Vano, Hollywood t'osareya ana—anakapwitthi. Vano, khula mutthu onimusuwela wahala, onnisuwela wira atthu ottuli a mahiku ale, wira yaari anakapwitthi ntoko a—aximiravo oovirikana, awo khayari atthu oolakeya, awo yaari ootakhala murima, awo yaari ntoko Al Capone ni Dillinger. Awo yaahikkhalana musewe a Hollywood awo animwiihana, mu—mutelevisauni, awo animwiihana, “Gunsmoke.” Nto miyo kiiwale *Mmonitorini* nihiku nno wira mmiravo yowo onimuttikha, Arness wala etthu emosa, wala Arness, wala miyo kooliyala nsina nawe t'ani, nto owo enanyihერიwa okuxa. . . Owo ori nipuro na Matt Dillon yowo aari mupilisa oKansas. Nto Matt Dillon aari owoova ntoko namarokolo. Owo aahiwoopela

axilopwana miloko mili ni athanu n'araru mmakhatani, athu oohittheka etthu, akhumaka Epoma y'oDodge awehereryaka mmirini. Nto okathi mulopwana mmosa waarw'awe, mutthu mmosa aanimwiihana n'umuhimeerya wira aahikhala muhureyi mmosa aarwa ephiro yeyo, nto owo aanikhuma vo ni, okathi mulopwan'owo waarw'awe, owo aanimoopela mmakhatani. Vano hiyo nimphwannya wira owo "mmiravo muuluaple" onikhumelela. Vano, eyo—eyo v'ekeekhai ovuwiha etampi. Masi axinamwane a elapo ahu anniwerya woohimeeryani vanci-ene mwaha wa Matt Dillon ovikana anwery'aya woohimeeryani mwaha wa Yesu Kristu. I—i—iloxa, sa isentavo muloko, ni manupa a ikuwo s'owara, sinithomeiwa—mo sowatta sikhani—ikapwitthi sikhani s'othweelana, ni ikofiyi sikhani seiyo—seiyo siniweryaneya othuma nipuro pi nipuro. Ti yooreera owara eyo, masi miyo ki—miyo kinimooleelani pahi, nyuwo moone. Nto awo—awo, olumwenku wa nakoso, onikuxa etthu yeyo n'upaka itolare imilyau sene ni yeyo.

48 Hiyo nihana ele nniihan'ahu "Nihiku na Patricio Owarya," hiyo nihana ele eniihaniwa "mahiku a itini." Nto olumwenku wa nakoso wookuxa yeyo, nto awo anipaka itolare imilyau sene. "Nihiku n'Aximai," nikuttha na maluwa. Vano, khula nihiku naahaana okhala nihiku noottittimiheya mama. Owo ori nipuro nimosa, owuuluvala, murowe mwamoone. Eyo enookhala y'ofayi vanci-ene ovikana maluwa othene nyuwo mwaarow'anyu owerya omuveleliherya, wala etthu ekina. Moone, masi awo anookuxa yeyo. Nno nsu, ni—ni hiyo nniitakaniha ni yeyo. Eyo vekeekhai khehiyo y'oloka. Masi exeni enrow'anyu wira? Moone, hiyo nri—hiyo nri pahi . . .

49 Miyo kineererya ophiya nipuro nimosa va wira kooleleni etthu emosa, yeyo miyo—miyo enkhupaly'aka. Nsu ti noothowa, Nsu na Muluku.

50 Vano, hiyo nniphwanya wira annihela nivalo. Nto nyuwo mootoko oweha? Aximiravo ahu anikhala "Ricky" ni "Elvis." Nyuwo mwakhalana mwana oniihaniwa siso, mwaakakhanye vowaakuveya, mmwiihane numaro "nimosa" wala "manli," ahiso etthu ekina. Muhiire, eyo etthu yoonanara . . . Nyuwo munira, "Exeni enivirikana mwa nsina?" Vano, vekeekhai, nno ninnihimya etthu. Nsina nanyu ninnisuwanyeiha makhalelo anyu. "Vano, Munna Branham, nyuwo muri munumeroloxia." Nnari, miyo nkikhanle! Miyo kiri mwa SISO ANIHIMYA T'APWIYA! Mwaha wa xeni yaary'aya okathi Yakope, owo aakhala ntoko nsina nawe, ntoko—ntoko mulipa-owoka, namanyohola, Yakope. Nto okathi Muluku omurukununx'awe, Owo aahirukunuxa nsina n'awe. Muluku aahimurukunxa Saulo wira akhale Paulo, Simoni okhala Pedru. Vekeekhai, yookhalana etthu. Nto Ricky ni Elvis, nto masina ntoko awo, ti nsina na naanano w'Amerika nenno nnimuriha mwana voohuupuweleleya mwa yeyo. Munnona etthu enihimya'aka?

51 Vano, kinwehererya wira nki . . . Vanreerela kitthikele ottuli ni kihikelele ottaiwenexa mwa erintta yeyo va, (munnona etthu enihimy'aka?) nyuwo mwahaarow'anyu wiwa sana. Masi itthu sothene iya nnakhala khasiniiwiwa sana ni mutthu pure. Awo khanivara, okhala wira awo aakhalana muuramelolo mmosa. Ti yeyo tu awo aniwiriyan'aya, masu yawo.

52 Nookhala nsu na amafilosofo, Comunismu, alaiheryaka etthu awo ahinwery'aya okhaliherya. Nave nlelo epantte yuulupale y'atthu a w'Amerika t'okela muComunismu. Vano, miyo kinnikhalaka muComunismu, mapuro a Comunismu, kiireke, w'Alemanha, epantte onikhuma nsuwa w'oBerlin. Awo yaahikkhalana mampa maalupale wira yooniherye ota. Nyuwo mwaahana wetta mpani mwaya, awo nnakhala khanamalihiwe. Owo mukhapelelo wowooha, awo aneererya onisukhumela etthu emosa.

53 Nto, oRussia, nipuro niyariwe Comunismu . . . Yowo, iyakha sinci-ene sivinre, okathi waary'aka mulaleyi mmiravo, miyo kaamwira iyakha miloko miraru ni miraru sivinre, okathi Nazismu, Fascismu, ni Comunismu saaveny'aya, Miyo khwira, "Miyo kinlavula mwa Nsina n'Apwiya! Othene aya anrowa omalela muComunismu." Masi, nyuwo mootoko wupuwela, Muluku oonihyerya ephiro emosa y'ovuluwa, yakhanle wira hiyo ninnitthara yeyo pahi. Ari atthu epantte emosa pahi mwa emiya a oRussia t'akhanle muComunismu, epantte emosa mwa emiya, masi awo t'ari epantte enihoolela. Epantte emosa mwa emiya ya Comunismu . . . epantte emosa mwa emiya ya Russia t'okhanle Comunisimu, kiireke, masi awo annihoolela.

54 Nto etthu emosaru, Hollywood ori nipuro nimosa, masi awo t'anihoolela.

55 Oophiyaka epantte yaneeraru wala ipantte piili mwa tthaaru y'atthu o Estadu Unido annirowa okerexa, ni atthu anira mpannta wa ekerexa, masi awo annihoolela muhina wa miromolelo iyo.

56 Etthu entthuneya oComunismu ti Nsu na Muluku ovenya eriyari aya, nto Nno nnoomuhela ehaya.

57 oFilandia, okathi mwammirav'ole aahihimuxiw'awe m'okhwani nihiku nne, nto awo yaakiruuha iquatra ttharu, vavo mwammirav'ola aahihimuxiw'awe, namukhwa; Atoropa a Comunismu, aRussia, yeemenle-ene vavo ni makhomaso a oRussia, ni maithori amoraka withoni waya. Awo yiira, "Hiyo nnoomwaakhela Muluku onwerya wahihimuxa anamukhwa." Eyo t'unyoonyiwa wa ekerexa Katolika ni ekerexa Luterana, ni miromolelo iye sothene, ni anikuxa musurukhu wothene, n'uteka mitthenkeso, n'uhaavaha atthu hat'etthu. Awo ankhala ntoko atthu akina. Yookhala . . .

58 Etthu entthuneya oRussia ti profeta ovenya vanlakani ni Masu a Apwiya, yowo onwerya—onwerya omaaliha iyano. Nto epantte ya namiloko mithanu na mixexe mwa emiya anooxintta.

59 Etthu entthuneya w’Amerika ti Nsu na profeta a Muluku, yowo aarowa owerya ovenya n’umulamula Hollywood, n’ulamula itthu iya mu Nsina na Yesu Kristu, nto Ekerexa ya Eroho Yowarya enooxintta. Evitikavitika yinci-ene, moone, masu manci-ene avirikanyaka Nenno.

60 Ekerexa, nsu naya, khula emosa wa seiyo enaatthuna athu anci-ene. Patista enaatthuna othene, Metotista enaatthuna othene, Prespiteriyana. Hiyo othene nihana iya. Nto aKatolika anikhala wira anrowa okuxa yothene eyo, nave awo anookuxa. Nno vekeekhai ti Nsu na Muluku nnikhuma mBibiliyani mu. Awo anooruma.

61 Masi Muluku Mulupale a Musulu wookiseryani onrowa oruma. Masantu anooxintta, nihiku nimos, Bibilia ohimnye siso. Awo anooxintta.

62 Masu owatta vootepaxa! Nto nookhala nsu na profeta owootha. Nno nsu nowoopiha, mutthu mmosa oniisihana mmansawe profeta. Profeta, vekeekhai, ti mulaleyi. Noolumo na naanaano “profeta” mara nnihimya “mutthu onlaleya eettihwaka ni mupuxeryo.” Ookhala mutthu mmosa yowo onvenya ni wiisihana mmansawe profeta, n’ukhotta Masu a Muluku, onikhotta Ekeekhai ya Muluku. Aakhala masu manci-ene!

63 Okathi vakhani pahi ovinre, aahikhala munna mmosa aakilokiherya moota wo orwa va, masi miyo... kinona wira owo aahitikinihiwa mwaha wa xeni miyo kaaronw’aka mpakha mphironi khurukunuwa khutthika. Nyuwo mwaakhanlene vava, munna, miyo kaaiwelela etthu, yaari ahu—apatthani ahu ooriipa, alipa—ooriipa. Awo aakhalana empa emosa va, nto awo aniihana, “Eliya Muhammad,” wala etthu siso, “mmiravo Eliya Muhammad.” Onvenya ni nsu, airaka wira awo t’ari nsu ninrowa waakumiha n—nloko n’atthu-oripa m’wevitikavitikani mu. Eyo, nyuwo moone, etthu yeyo, mma—mma—Mmak’aya ori va, Muxikitthi aya. Vano, nyuwo khamunoona, wira mupaceryelo aya, ti woovonyeya!

64 Athu-oripa, ari ntoko athu ootteela, athu ookhwila, athu a ncano, khahi otthikela w’e—otthikela w’Emakani, masi otthikela wa Kristu, ikano seiyo Bibilia siniixuttih’awe. Emaka ti yoovirikanyiha Masu. Vano, miyo kaahikhalana mureerelo wo oweettiherya Amaka ikonto muloko wa Kristu emara emosa oDurban, Africa do Sul. Eyo kheniruuha hat’etthu yoohikhala pisikoloxia. Nto pisikoloxia ti yooreera episikoloxia yaahikhottkeru Masu. Masi okathi pisikoloxia enikhott’aya Masu, weso episikoloxia yoovonya. Eyo eniruuha nsu noohisuwanyeya. Itthu sothene sinoovira masi Masu a

Muluku nnari, Yesu ohimnye siso, “Erimu n’ilapo ya vathi sinoovira, masi Moolumo Aka khankhalakhala aviraka.” Vano, nyuwo moone hiyo nihana okhala ni Masu, Nsu.

<sup>65</sup> Itthu sinci-ene sootapanyeya! Atthu anoovenya, awo khansuwela Masu, vano awo anoohimya itthu, nto alakela sinniiweya ntoko sootthokeleleya vanci-ene. Comunismu etthu yoothokeleleya vanci-ene, “Atthu othene yeyo. Khakhanle tho makapitalista, awo othene maComunista.” Nyuwo mootoko wemela wira muupuwele wira owo muhakalaliho woowotha, Comunismu? Nto otakinhe vai ettharihelo wa sothene iyo? E. . . Yesu ohimnye wira, “Iroho iyo piili saarowa okhala soolikana, yaarow’aya owootha ale Oothanliwa vaaweryaneya.” Nto itthu sothene xetwani orin’awe, ohononiwa wa etthu Muluku opattuxaly’awe. Etampi e—exariya ehononiwe. Wotha ti Ekeekhai yoothaphuleliwa sana. Oraruwa ti—ti, muteko Muluku onirummy’awe, woohononiwa. Ohaamini wothene ohononeya wira wamini. Nyuwo muhana okhotta Ekeekhai wira mukuxe e—ele ehononiwe. Moone, mookolele masu awo, mweererye ni Masu nto moone yaakhanlene Ekeekhai.

<sup>66</sup> Oh, moota naarow’ahu owerya ohimyaxaxa, masu ala a olelo, masi okathi ahu woovira. Masi, aakhala masu manci-ene atthu ahinsuwel’aya etthu yowira. aMetotista wookiseryani anoomwiwa mulaleyi Patista, awo anoorowa weiwo, awo anookhala iwe okathi vakhani naananoru anoorowa wa Luterano. Ni mwa aPentekosite, awo aakhalana makhuru oovirikana, mmosa onoorowa wa mmosa, nave mmosa wa mukina, otthika n’urowa. Eyo enooniherya wira nyuwo khamulimpe. Mwiiwelele Nsu Nawe! Nna niri va, nilempwe vapapheloni, Nsu, Nsu ninoolipiheriwa Nno nakhalaru Ekeekhai.

<sup>67</sup> Olumwenku wa mukerexa khonsuwela etthu yowira, olumwenku wa politika ori mw’evitikavitika. Itthu sothene sinkhala ntoko siri m’wevitikavitika. Atthu anootthyawa akhumaka nno, etthu ekina t’enivenya, ekamisa, ekhasako. Okathi waary’aka oRoma, awo yaahikhalana misomari muloko ni thanu na xexe sooliphiwa seiyo saakhomeliwe mmatatani mwa Yesu; nto siri ttharu pahi, masi nlelo awo aakhalana valemppwaya misomari muloko ni thanu na xexe soovirikana. Vano, evirikanelo xeni enikhala wa ole orina musomari? Kristu khatonko onihiyerya hiyo misomari wira nikokhoreleke, Owo onihiyenrye Eroho Yowarya, mwa Masu Awe! “Miiriirya iya sinimwatthara ale anrowa wamini, anookhalana misomari s’eekeekhai?” “Awo anookhalana. . . Miiriirya iya sinimwatthara ale anrowa wamini, animwira mpantta wa mutthenkeso Miyo kipacenry’aka?” Owo khapacenrye hata mmosa. Munnona moota nsu niry’aya noovirikana?

<sup>68</sup> Masi, “Miiriirya iya siniwatthara ale anrowa wamini; mwa Nsina Naka awo anoowoomola axetwani.” Vo t’ari Masu. “Awo

anoolavula ni ilavulelo isya; anovara inowa, seiyo sihinrowa watakhalaha. Awo yawurya itthu siniva, khasinrowa waahaaxa. Awo yawiixathera matat'aya aretta, awo anoovona." Nto nyuwo muwehe itthu iya ni sothene sikina mwa Solempwa muhele vamosa.

<sup>69</sup> Vano, eyo meekh'aya khenilipiherya, nnakhala. Ti vavo hiyo aPentekosite nnirow'ahu ephiro yoovonyeya. Yesu khahimye wira, "Anci-ene animorwa wa Miyo nihiku nne, ni wira, 'Pwiya, miyo nkivanre itthu suulupale mwa Nsina N'anyu? Miyo nkilaleenrye mwa Nsina N'anyu? Miyo nkivanre iya sothene mwa Nsina N'anyu?" Nto Yesu khwira, "Mukhume wa Miyo, nyuwo munira sotakhala, Miyo nkinatoko woosuwelani." Munnona, axinn'aka athiyana n'alopwana, mwaha onilamulel'aka vancipale ni wuulumela nloko nna? Nyuwo poti olavula ni ilavulelo ntoko atthu ni Malaikha, nyuwo poti wiina Murohoni mukerexa mothene, eyo kherina nata ni Yeyo.

<sup>70</sup> Miyo kinniwoonaka Amaka wiina siso. Miyo kinniwiwaka matothoro . . . mmaxaxani mwa akhwiri, owoona akhwiri ovenya n'ulavula ilavulelo n'utaphulela, n'uhimya orattene etthu yaarowa okhumelela, khikhumelela siso. Miyo kinnoonaka hata elapi ovenya n'ulepa mattaava oohisuweliwa, ni okhala mmosa pahi aawerya osoma, nave yaari ya xetwani. Muhilipiheryeke mukiseryo anyu Woohimala vasulu va moonelo. Satana onniwerya otakiha khula mmosa wa miyonelo iyo. Khahi . . . Eyo omusuwuela Kristu, etthu enoovirikana mmakhaleloni mw'anyu. Muwehe makhalelo anyu nto mulikanyihe ni Masu, vano moone vatthu vary'anyu. Mwiiraka mwalikelo, vekeekhai.

<sup>71</sup> Inamwi mitakiheryo iya sothene, masu oowootha, maprofeta oowootha, itthu sothene iya sikina sinvenya, Yesu nlelo ohimye wira, enamwi sothene iya, "Mutthu aiwa Nsu Naka khukithara Miyo." Owo ti Masu. Nwiriyan, muteko Awe wa hiyo olelo, mwa masu ala othene. Yawo, miyo kihimye'aka wira yaamukuxa iwora wira kihimye masu ala othene. Nto eyo ti yo waatikiniha atthu, eyo etthu y'elolo. Nto, numala sothene, nyuwo khamurina okathi wa neenli, nyuwo muhana okuxa Neno naanaano. Nyuwo poti ohikhalana okathi ohiyu ula. Nyuwo poti ohikhalana okathi melo. Ti naanaano! "Mwaiwaka Nsu Naka, muhilipihe murim'anyu, ntoko mahiku waapaciw'awe. Vano t'uri okathi. Ola p'ukathi wookhupaleya wira khula mutthu aiwa Nsu N'aka." Eyo enoorowa wooniherya wira Nsu N'awe naamurowa okhala vavo eriyari y'evitikavitika yothene. Owo nlelo ookhalana Nsu! Mwaha wa xeni? Nsu N'awe nnookhala mahiku othene. Ela eri va, "Erimu n'ilapo ya vathi sinoovira, masi Nsu N'aka khaninvira," Masu Awe.

<sup>72</sup> Nrowe pahi nikuxe, niireke, minutu mithanu sikina, naanaanoru. Munowerya, munokhala okathi yowo, wala minutu vakhani? Vano, kinimwaakuva. Nrowe naakuxe amosa amosa yaaiwale Nsu nna khwiwelela Neno. Moota Nno

naawiirihaly'aya wira, etthu naawiirihaly'aya wira. Vano kinrowa ovira sinci-ene wa—wa Solempwa va, wira eyo elukame naanaanoru mwa nyuwo: moota Nno naarukunuxaly'aya makhalelo aya n'ale yaari vakhiviru ni yawo; moota awo yaakhanly'aya ootikiniha, hiyo nniihana "ootikiniha." Khula mutthu otonko omwaamini Muluku, aahaniwa ntoko ootikiniha. Okhala wira, nyuwo mwathara mweettelo wa m'olumwenkuni, yookhala etthu evonyen'ye ni nyuwo. Okhala muKristu nyuwo muhana okhala ootikiniha. "Maana othene ale anikhala makhalelo ooreera mwa Kristu Yesu anoolupatthiwa mulaponi. Owo aari m'olumwenkuni, olumwenku opattuxiwe ni Yowo, nave olumwenku khiwaamusuwenle Yowo." Vowaakuveya vano, nwiriyane orattene okathi nimalih'ahu.

<sup>73</sup> Atamu aahiiwa Nsu Nawe, mw'eriiryelo ya makaaripi, aahipatthaana ni Yowo. Khiwaxhanle hata olamuliwa mwa Atamu. Owo aaniiwa Nsu na Muluku, nto owo khwira, "Tithi, vano kinoorupathi wira kirupe." Vano owo aahirupathi, nto Hawa mmoononi mwawe, kharamu, nanthavi, ni inama s'owali simurukurenryene yowo, khayaakhanle hata yootakhala, hata enamuna y'owereiwa, hata enamuna y'oxanka sinto aamuvenya vaasiisu, awo anorowa ovenya. Atamu aaniiwa Nsu N'awe wa enamuna yaatthuney'aya wira aiwe Nenno.

<sup>74</sup> Masi nihiku nimosa owo aaiwelenle nsu n'amwar'awe. Venreerela miyo kihye eyo okathi vakhani toko. Masi owo aaiwelenle nsu noovonyeya, enamwi yaakhanleru amwar'awe, nlutte n'ophitaanaxa owo aarin'awe mulaponi. Mwaha wa xeni owo aahimmy'awe, ntoko Yobi, "Nyuwo munlavula ntoko muthiyana ovahuwa"? Nto owo airale siso, nloko nothene n'atthu naarowa okhalaka ohiya okhwa. Eyo yaahirukunuxa mukhalelo w'atthu ni okathi. Masi owo aahiiwa Nsu na Muluku, owo aahipatthaana ni Nenno, masi okathi owo orukununw'awe...Owo aasuwenle sai wira amwar'awe yaahivonya? Muupuwele, nno naari noosivela.

<sup>75</sup> Hiyo nnuupuwela olelo wira mutthenkeso ahu, ekerexa, hiyo nnuupuwela wira oreela wahu olelo ti Muluku onnitheyela. Eyo enikhala ntoko yooreera. Yooneya ntoko yooreera okathi Mikaya eemenly'awe vale oholo wa maprofeta imiya xexe, ni elapo yothene yaari y'awaya, nave aFilisti yaari mwemmo, ahiso aAsiria, yooneya ntoko yooreera. Maprofeta ala yaahimya wira, "Muroweke, eyo ti y'awihu. Mwakuxe!" Masi nno khanari Nsu na Muluku. Nto Mikaya aahirukunuwa khutakhaliha nsu nne. Nto owo aasuwela sai wira yeyo? Okhala wira yoonaly'awe yaari orattene ni Masu. Eyo ti enamuna emosa pahi y'ororomela ni wona olelo, ehana okhala mwa Masu.

<sup>76</sup> Vano nyuwo mooweha? Vamanly'awe Atamu wiiwelela nsu nikina ohiya Nsu na Muluku, amwar'awe yowo...Ni ekerexa eniwelela nsu na mutthenkeso aya, ahelaka-mo iyaminelo ohiya Masu, yaahiyaka okhala khula enamuna awo antthun'aya. Awo



yaarowakaru okerexa ni wira mpannta wa ekerexa emosa, eyo t'entthuneya. Nlutte noophitanaxa mutthu-owaamini orin'awe mulaponi, wa awo, ekerexa. Masi mutthu-owaamini, mutthu-owaamini a ekeekhai, nlutte noophitanaxa ti Eroho Yowarya, ti Masu a Muluku.

<sup>77</sup> Siso nyuwo muniphwanya wira Atamu aahisuwela mukhalelo awe, ni aahiiwa Nsu na Muluku niihanaka tho, nave owo aari mmakukhuni mwa efiku okathi uwo. Masi nno naari Nsu na olamuliwa, "Nyuwo mwiireneni etthu ila?"

<sup>78</sup> Miyo kinnitikinihiwa sinto Amerika olelo, wala olumwenku mwa mawowo aya a etini, ntoko siry'aya, ni Amerika omiryaka, amiriwaka, enookhala etini ya elapo yothene voohilokelaxa. [Nipuro vahitthu mufitani—Mol.]

<sup>79</sup> T'ani okilaanthi oholo waka? Miyo kosuwela wira iya ifita sinrowa orowa m'olumwenkuni mothene. Hiyo nookhalana ethhokihero muteko wa ifita, wira khula Mutthaka onikeliha olumwenku wothene, ilapo sothene sikina.

<sup>80</sup> Ahe, vano nyuwo mwaweha ni wona, nyuwo muri mmakukhuni mwa efiku. Okathi Nsu n'ekeekhai na Muluku nnikhum'aya, awo khansuwela etthu yowira ni nenno. Eyo ti yootikiniha, awo khansuwela etthu yowira.

<sup>81</sup> Naanaanoru, Nowe aahiiwa Nsu na Muluku. Nno naamutthokiha wira nivuluxe ekumi awe, nto owo aahitthara soruma sothene khukhala siso.

<sup>82</sup> Mutthu aiwa Nsu. . . Vano nwiriyane, muvare ela orattenexa. Muhivonye. Mutthu aiwa Nsu na Etthu, ni Eyo yalipiheriwaru okhala Nsu na Muluku, ni mwa okathi aya, nto eyo enakhuma wa mutthu, erimu n'ilapo ya vathi sinoovira masi Masu awo khanvira.

<sup>83</sup> Nowe aahiiwa Nsu, ni naahilamula olumwenku. Vano awo yaanitheya witho wawe okhala wira mu—Mutthaka awe khiwaalikana ni s'ophwanya saya sa siensia, masi yaahirupa epula khuhonona olumwenku wothene. Munnona? Nsu N'awe naakhumme, epyo yaari memmo. Khula okathi enikhala siso.

<sup>84</sup> Samuweli, aahituthuwa okathi vaaiwaly'awe Nsu na Muluku, wira owo aari. . . aahirowa omulamula Eli, mulopwana yowo aamulenle. Mulupwana yowo aakhanle ntoko tiith'awe aamulenle ni aamulyinhe.

<sup>85</sup> Axinna alaleyi, miyo kaahaana? Alaleyi, imara sinci-ene, vasulu va ilipiheryo sa miromolelo saya ni iyaminelo, ipaphelo s'okhupaliwa waya munfukhoni mwaya, sa titi aya, mutthenkeso yowo waalenle ni walyiha ni waaruaha ni khwaakeliha mukerexa, khwaakeliha mmuthukumanoni, nyuwo muhana owanana iye awo aniixuttih'aya. Munnona? Moota yaarow'aya okhala etthu yootakhala wa murumeyi a ekeekhai a Muluku wiiwa Nsu na Muluku, ni okhala ootthikela

mutthenkeso yowo mey'awe, wira, "Nyuwo munoolamuliwa okhala wira khamunaakhela Masu ala." Etthu xeni!

Yaari y'omurikela Samuweli. Masi owo aari profeta, owo aahaana wira. V'ohicala sinto yaamurowa winiha murima wala nnari, owo aahaana wira enamuna p'inamuna.

<sup>86</sup> Moise aahiiwa Nsu na Muluku. Owo aari oosareya teologia. Owo aanisuwela sothene *ovolowa* ni *okhuma*, masi aahivonya. Owo aahiiwa Nsu na Muluku, Moise khaakhanle tho mmosaru.

<sup>87</sup> Nto khavo mutthu onikhala mmosaru. Nyuwo poti wiiwa owaruni wanyu n—Nsu nilavulaka, masi okathi muniw'anyu mmurimani mwanyu, Nsu nilavulaka, moone, nto nyuwo munamwiwa. Nyuwo khamunoono ni nitho nanyu. Nyuwo muniweha ni nitho nanyu, nyuwo munoono ni murima anyu. Nyuwo moonu ethu, ni wira, "Miyo nkinoona eyo," enihimya wira khamuniwa sana. Nyuwo khamuniwa ni maru anyu, nyuwo muniwa ni murima anyu. Imara sinci-ene maru anyu anniwa Nsu na Muluku n'ekeekhai, nave Nno nnootherekuwa mwa nyuwo ntoko maasi ottuli wa nrattha. Masi okathi muniw'anyu v'ekeekhai, muniwa ni murima anyu.

<sup>88</sup> Nto teologia othene Moise aarin'awe, owo khaiwale Nsu na Muluku. Masi nihiku nimoso Muluku aahimwiihana makhampusi ula a ipwittipwitthi a iyakha miloko mithanu na miraru mpakha epantte emosa khulavula ni yowo, vano owo aahivara Neno. Owo aahona wira Ole aari Muluku. Etthu yopacerya Owo aamwirenly'awe Moise, waari olipiherya Masu Awe, "Miyo kinookhuruwa, Miyo kihuupuwela etthu yahimmy'aka."

<sup>89</sup> Nto ela t'itthu Owo aahimaly'awe wa mahiku ookiserya. Owo aarowa wavenxa atthu mwa Amalapo, ni anatiri othene.

<sup>90</sup> "Miyo koohimya ela." Khwira, "Moise, murule ixapattho sanyu." Ma molumo makina, muttittimihe Neno. "Vano mmurihele vathi ttotto anyu." Nto e—ekopo yowuma ya mothakoni khuthatuwa enowa, nto Moise khuttotta, khutthikela mukhalelo aya tho. Munnona? Owo aahisuwela wira aari Muluku, okhala wira Muluku aahihimya, Masu a Muluku, Masu yawo Owo aalavul'awe, khwira, "Mmurihele ttotto ori mmatatani mwanyu." Awo Masu a Muluku. Muheererye wira etthu emosaru, awo khahiyo Masu a Muluku wa nyuwo, awo Masu a Muluku wa Moise. Va t'ari Masu a Muluku wa nyuwo! "Mmurihele ttotto." Owo khuthatuwa enowa. Khwira, "Vano nyuwo munimoova? Muvare omwiilani waya," nto eyo khutthikela tho. Masu a Muluku wa yowo. Owo airale exeni? Muluku aalipihenrye Masu Awe.

<sup>91</sup> Miyo kaahimwaakhela orame va miyeri vakhani sivinre, voophiyaka, vookhala, oh, yoophiya eyakha ntero, yoovikana eyakha ntero. Muhano mmosa mwamukhane epantte ekina ya telefoni, ni mulaleyi mmosa Patista ni mulaleyi mmosa

muPentekosite. Owo khwira, “Munna Branham, Apwiya aakikhaliha muthiyana profeta.”

Khwira, “Vaareera.”

<sup>92</sup> Khwira, “Mosuwela, miyo kinileeliwa wira nyuwo muhimye wira nyuwo—nyuwo mookhalela onamoona wira muteko aka onirwa wa Muluku.”

<sup>93</sup> Vano, miyo nkaakhanle owira yeyo, eyo ti yoovirikana ni Masu. Vano miyo khwira, “Muhano, eyo ti yoovoneya. Miyo nnakhala nkinoosuwelani.”

<sup>94</sup> Nto mulaleyi Patista, miyo kimwiiwa, kimwiiwa mulaleyi muPentekosite. Owo khwira, “Vano, kirina muthukumano nno.” Nto khwira, “Apwiya anipaka itthu suulupale.”

<sup>95</sup> Miyo khwira, “Miyo kooxukhuru mwaha wa yeyo.” Owo khwira. . . Miyo khwira, “Awo aatoko wooleelani etthu?”

Khwira, “Ayo, miyo kootthokiha muteko muulupale mmatatani mw’aka.”

<sup>96</sup> Miyo khwira, “Vaareera.” Miyo khwira, “Vano, muteko anyu t’uvi?” Miyo khwira, “Apwiya yoohimeenryeni exeni?”

<sup>97</sup> “Owo khwira, ‘Orowa oPhoenix, Arizona, nihiku *khata-khata*, nto miyo kinrowa woovahani Mukoti ile wa Ewero Dutchman orimeenle, vano nyuwo munookuxa ewero yothene eniphwanyaneya memme munoorowa waakhaliherya anamalaleya mulaponi mothene.’” Hiyo othene nisuwenleene wira Mukoti Dutchman orimeenle ehantisii. “Vano Owo oohimya.”

<sup>98</sup> Miyo khwira, “Ahe, miyo kinimooleelani moota w’osuwela aari Muluku wala nnari.” Miyo khwira, “Mukhale weiwo nihiku nenno. Nto nyuwo mwaphwanyaru Mukoti Dutchman, vano owo Muluku. Mwaahiphwanyeru Mukoti Dutchman orimeenle, weso murukunuxe murima ni moomole eroho eyo yoowootha mwa nyuwo.” Eyo t’inamuna y’osuwela aari Muluku wala nnari.

<sup>99</sup> Muluku khwira, “Moise, mmurihele vathi ttotto, onoothatuwa enowa.” Owo khwira yeyo. Owo khwira, “Muvare nto enookhala tho ttotto.” Owo khwira yeyo.

<sup>100</sup> Okathi Muluku onimuhimy’awe natiri a muteko mmosa mahiku ala ookiserya, Owo onoomulipiherya oratte-ene siso Owo ohimmy’awe wira aamurowa omupaka. Vano nyuwo munoosuwela wira murina Nsu n’ekeekhai. Nyuwo muniwelela Etthu y’ekeekhai, okhala wira ti Masu anilipiheriwa. Munnona? Oh, moota. . . Kileveleliwe, miyo. . . Vaareera.

<sup>101</sup> Moise iirale yoovirikana. Nkawehani etthu xeni—etthu y’otheiha Moise iiraly’awe. Vano, okathi wothene nyuwo mwaattharaka Nsu na Muluku, nyuwo mwa mulolo, vamaithoni v’olumwenku. Nihiku noottharelana, khumphwanya Moise, ni mwar’awe amuwenle-ene puuru, ni mwammiravo muyuununi

mwawe, ahiso eyo ti y'onikhuma nsuwa, “mwanamwane” muyuununi mwawe, nto awo yaarisa vavo. Mulopwana mutokwen'ola ni ireru simorelaka vathi ntoko *sisa*, ni muru awe wa ntari waaryaka, ni ttotto mmatatani mw'awe, amweettihaka puuru mwamukhani, arowaka w'Exitu vowaakuvaxa ntoko saawery'awe orowa. Mutthu mmosa khwira, “Moise, munrowa vai?”

<sup>102</sup> “Kinrowa w'Exitu, wira kaxintte etthu ile.” Weiwo owo waavonny'awe ntoko mmiravo, owo aahivonya ntoko mulopwana mmosa nakhotto, masi va owo aamurowa oxintta. Nto owo aahiira. Mwaha wa xeni? Owo aarimwiiwa Nsu na Muluku khoona Nenzo olipiheriwa mwa nihiku nawe, wa itthu saatthuneya okhala nihiku nawe. Owo aahoona.

<sup>103</sup> Paulo, nFarisi a enamuna y'awawe, oosareya teologia sintoko saawery'awe okhala, masi nihiku nimoso owo aahiwa Nsu na Muluku. Owo aahoona Nlumi na Moro, vano owo khusuwela wira yaahikhala etthu emosa yoovirikana. Eyo yaahirukunuxa makhalelo awe. Hata wira yaakhanle aFarisi akavi, maKamaliyeli akavi wala etthu p'itthu ekina yaawerya omukhuwelela Paulo, “nyuwo moovonya, nyuwo moovonya,” Paulo aahiwa Nsu na Muluku, owo aahisuwela wira Nno naari Ekeekhai.

<sup>104</sup> Pedru, natiini ntoko saawery'awe okhala, asukaka iphattu s'ahumu, owo khaarowa okhura hata enama. Nnari, mulopwana. Owo khaarowa okhalana nata n'yo nnakhala. Owo v'ekeekhai aasuka iphattu s'ahumu, voolikana ni Masu. Exeni yiiranan'ye? Nihiku nimoso owo aahiwa Nsu na Muluku, “Muhiiireleke ya mwiikho ni yootakhala, ele Miyo kireerihaly'aka.” Owo aari mutthu oovirikana. Owo aari oolikana wira arowe nipuro pi nipuro Apwiya yaamurum'aya.

<sup>105</sup> Kimalihaka, miyo poti ohimya ela. Aahikhala mulopwana mmosa okathi mmosa aari mutthu-owamini. Owo aarimookhwa mahiku maxexe. Owo aari mmahiye, anukhaka, owunta, masi owo aahiwa Nsu na Muluku olavula, “Lasaro, mukhumelelota!” Vano yakhala wira Nno naahimuruuha mutthu amanlene okhwa ni wunta, exeni Nno narow'aya wiiriha ekerexa nlelo erina ekumi mwa yeyo? Nno naahana waahihimuxa, mw'evitikavitika wa masu ala othene hiyo ninlavul'ahu, a etini, ipolitika, Hollywood, oprofeta wothene woowootha n'itthu sinkhumelela. Eriyari wa sothene iyo, Nsu na Muluku n'ekeekhai nnoomwiihana mutthu, okhwiye mutampini ni sotakhala, wira atthikele-tho okumi. Nno naahaana okuxa ekerexa yookhotta wamini ni wiihana wira etthikele-tho okumi. Vekeekhai!

<sup>106</sup> Muupuwele, kimalihaka, miyo kinihimya ela, nto vo kinoomaliha. Yesu oohimya, “Okathi waamoorwa, yowo othene ale yaari mmahiye yaarow'aya wiiwa Nsu na Muluku.” Ni nyuwo munoorowa wiwa Nenzo. Hata wira muri mukhalelo

xeni, nyuwo munoorowa wiiwa Nno enamuna p'inamuna. Nto akina w'ale anrowa okhuma mmahiye, anwela olamuliwa. Awo anniiwa Nsu, nnya Nno nnoolamula. Nto nyuwo mwaiwaru Neno olelo, "Olelo, vaviraly'aya okathi munci-ene, nyuwo mwaiwaru Nsu Naka, muhilipihe mirima sanyu, sintoko mwiiraly'anyu mahiku opaciw'awe." Ni vaari wira nyuwo, athu aPentekosite mwiithukumanyaka mwa iyaminelo emara ekina, n'itthu s'olumenku, "mooneyaka ntoko athu a othunku nave mukhoottaka Owerya waya," muhinatthi ovenya m'ohihimuwani wira mulamuliwe, okhala wira Nsu na Muluku neno ninlavula ni nyuwo vano mwa Masu nnimoolamulani nihiku nne.

<sup>107</sup> Nyuwo mwaary'ene mutthu-owamini ookuttihiwa pahi, Nsu na Muluku ninnikhuwela mmurimani mwanyu vaasiisu ula, "Nyuwo mwa mutthu-owamini ookuttihiwa," vanreerela murukunuxe murima!

<sup>108</sup> Nyuwo axilopwana, axithiyana, amiravo wala aximwali, muhinimukhalela Kristu, ni Nsu na Muluku ninlavula ni nyuwo mwa Masu Awe ni nniira "muhiye wira eyo," vanreerela mwiire yeyo. Okhala wira nyuwo munoorowa wiiwa Neno tho nihiku nimoso, nave Nno ninrowa woolamulani. Nyuwo muhikhootteke Nno, Nno ninlavula ni nyuwo vano. Ni, muupuwele, ninookaravariwa.

<sup>109</sup> Nto ale aniira yooreera ni aniiwa Nsu Nawe, anoohihimuwa mwa exariya, arowaka m'Ovuwani, arowaka Wirimu.

<sup>110</sup> Vano nyuwo munoorowa wiiwa Nsu na Muluku okathi omosa. Khino voottetheya-vo vaasiisu ula Nno ninlavula mmurimani mwanyu, wira nyuwo mwaahaana orukunuwa ephiro eyo enrow'anyu, orukunuwa mutthikelaka wa Muluku. Vano, muupuwele, awo anookaravari Nsu nno ninlavula mmurimani mwanyu, Wirimu. Nto nihiku nimoso okathi Yesu oniihan'awe, ni othene ale ari mmahiye, othene, ooreera murima ni ootakhala, anoohihimuwa. Nto vo Nsu nimosaru nenna nootthikela ovaanela wa nyuwo, "oPhoenix, Arizona, Ettiminku *khata* vaasiisu, okathi mulaleyi ookhalinh'aweni okathi munci-ene, alavulaka mwaha wa Nsu, miyo koolavula ni nyuwo; kihooleelani nyuwo athiyana wira muhiye maihi anyu yinnuwe, muhiye owara v'ohiloka; kihooleelani nyuwo axilopwana wira muhiye wootha iwo, ompaha sona; kihooleelani nyuwo alaleyi wira murukunuwe mutthikele Masu a Muluku." Munnona enihimy'aka? Eyo ekeekhai.

Nsu nne noomaaleleya nnihimya, "Eyo yaahaana okhala yooreera."

<sup>111</sup> Kaarina yo orwa ntoko Nikotemo, miyo nlelo kaamweererya orowa vale. Miyo kaamoorwa wa Yowo, n'urwa iwe nipuro nimoso mothakoni, ni wira, "Pwiya Muluku, miyo kiri va, mukirukunuxe naanaano. Mukuupe mwa mukhalelo Anyu." Mutthikele Masu. Nipuro nimoso nyuwo munoon'anyu wira

munkhala ota wa Masu, mutthikele vavo naanaanoru, okhala wira ikuru s'omalela sa nikwicili siri va nlutteni vaya vootteetheyaxa. Nto nipuro pi nipuro mmakhaleloni mwanu vavo nyuwo muhin'yaanyu y'oruma ya Muluku, wira murumeele ephattu, ti vavo nikwicili nanyu ninrow'aya ottumuwa hata wira nyuwo mulimpe moota xeni mwa itthu sikina. Muvarelele ntata na Muluku nihinrukunuwa.

<sup>112</sup> Nivekele. Olelo, vaviraly'aya okathi munci-ene, Pwiya, Nyuwo mwaahihimya wira Nyuwo mwaamulavula, Nyuwo mwaamulepa ikano Sanyu mmapaweni a mirima. Miyo nkinsuwela eri oholo waka. Ethhu emosa pahi miyo ensuwel'aka wira okuxa Masu Anyu ni omwarya Yawo, vekeekhai Awo anoomaka vathi va maluku nipuro nimosu. Miyo kinvekela, Muluku, wira Nyuwo mulavule ni khula mutthu mmiravo, khula mutthu a eriyari, mutthu mutokwene, anakheleru mutthu ti mutthu. Mulavule ni murima aka, Pwiya. Mulavule ni mirima s'alaleyi ala. Mulavule ni murima wa muthukumano.

<sup>113</sup> Hiyo ninvekela, Tithi, wira olelo hiyo niwe Nsu Nanyu. Ni hiyo noosuwela, ntoko saary'aya mahiku a Samuweli, yowona yookhumelela etthu yoorika, ni yaahaatikiniha atthu. Siso t'iry'aya olelo. Hiyo nookhalana s'oloha ni anamaloha, nookhalana anamalavula ni anamataphulela, masi yowona yookhumelela enrwa'aka ni Masu a Apwiya, ni yaahittharuxa. . . Hiyo ninvekela, Tithi a Wirimu, wira Nsu nenne naakhuwela mothakoni, "Mulokiherye ephiro y'Apwiya," wira hiyo naamini wira Eroho Yowarya ennivaha Nsu nenno tho olelo, "Mwiilokihe mwaha w'Orwa wa Apwiya!" Nto moota ninkhal'aya nootikiniha Nenno, 'okhala wira aakhala masu manci-ene makina wira amaalihe Nenno ni akhumihe, masi Nno ti nooreera mmaaruni w'ale aniiwa Nenno. Miyo kinvekela wira Eroho Yowarya vano evare muteko muhina mwa mirima sahu hiyo othene.

<sup>114</sup> Nto nirine-ene miru sahu sowaarama, ni miyo kinroromela wira ni mirima sahu sowaarama: Nyuwo mwaasuwenle-ene nipuro nimosu vavo nyuwo muhiwelenly'anyu mwa makhalelo anyu, mwasuwela Yolempwa emosa, yeyo nyuwo ensuwel'anyu wira mwiixuttiho wa Bibilia yeyo nyuwo muhiwananne anyu ni yeyo, okhala wira etthu emosa, nsu na Hollywood niwiirin'heni nyuwo wira etthu yovirikana. Nipuro nimosu nenno nyuwo alaleyi muphwannye anyu nipuro nimosu mBibiliani, nikhante tthiri Ekeekhai, masi nyuwo mosuwela wira mutthenkeso anyu waamurowa owoomolani nyuwo mwaixuttiharu Yeyo, nave nyuwo mosuwela wira eyo tthiri ti Ekeekhai. Wa nyuwo atthu munikuxa etthu yootakhala, munikhala makhalelo ootakhala. Nyuwo axitiithi n'aximai muhineererya wattharuxa an'inyu, muhinthuna waalela. Nyuwo poti weererya ikuru sanyu, nave awo anrowa m'olumwenkuni mwa khula enamuna, masi nyuwo

munikhala ethonyeryo wa yawo. Vano nyuwo mwaahiireke yeyo, Nsu na Muluku ninlavula ni nyuwo, “Muhiire yeyo.”

115 Nto vano ni miru sothene sowuurama ni maitho othene oophunyiwa, ni wira Muluku a Wirimu awehe vathi muhina sa mirima wa mutthu ule onivoliwa etala ni aphwanye nipuro vavonyaly’aya. Nto ni ntata noovenxeriwa Muluku, yiiraka, “Pwiya, miyo vekeekhai kintthuna Nsu Nanyu wira nikhumihe ohaamini wothene, ni itthu sothene sihikhanle ntoko Nyuwo, ni mukikhalihe ele Nyuwo mwaarow’anyu okhalana wira miyo kikhale.” Mwaamuvenxa matat’anyu, okathi nyuwo . . . ? Apwiya yooreeriheni. Muluku ooreeriheni.

116 Vano Bibilia oohimya, Yesu oohimya, nto anakhaleru masu awo othene makina, “Nlelo mutthu aiwaru Nsu Naka.” Khimutthara Yowo, nyuwo munorowa ophwanya emphavel’anyu.

117 Pwiya, okathi onoomala. Masi Bibilia ohimye wira, “Othene ale yaamini, yaanipatisiwa.” Miyo kinvekela, Tithi a Wirimu, wira khula mmosa w’ale avenxale matat’aya mwa olapa w’ekeekhai, wira Masu a Muluku awo anisom’aya, ni wona wira awo aavonya. Miyo nkinatoko waweha nusu na yawo. Kahi yawaka miyo waweha, ti yawinyu Nyuwo waweha, Pwiya. Nyuwo munnisuwela niwoko ni y’otthuna ottuli wa ntata nne nivennye. Mwaahiye, opacerya ewora yela, akhalane mmurimani mwaya, “Opacerya nihiku nna, mpakha oholo, miyo kinookuxa Masu a Muluku ni Nsu na Muluku, kitthare Neno hata wira esisapo xeni.” Ni wira akhalane mmuruni mwaya, okathi anrow’aya, esipo ya mulipa-olepa, “Ennitthuneya Yesu okuxa mwikimanyo mekh’awe, nto olumwenku wothene orowa wootaphuwa? Nnari, wookhala mwikimanyo wa atthu othene; wookhala mwikimanyo wa miyo. Nto mwikimanyo yola w’ovaheriwa miyo kinookuxa, mpakha w’okhwani onookihimuxa.” Nto Nsu na Muluku naalavulaka, “Miyo kinoovenya mwa exariya Awe, maana miyo kinnitthara Nsu Nawe, Nsu na Masu Awe.” Miyo kinaaruuha awo wa Nyuwo vano, Pwiya, mwa Nsina na Yesu Kristu.

118 Vano nirine-ene miru sahu sowuurama, nyuwo muhimyaka olapa wanyu ni natiri anyu. Miyo kiri oomuxankela mwammiravo okilanthi va, arukunxaka muru awe. Nto nookhala Nsu na ekerexa, “Miyo k’Apwiya kinvonihia iretta sanyu sothene.” Nno Nsu mukerexa. Ni othene nyuwo muntthuna ovonihiwa, ni nyuwo munikhala makhalelo owiivahererya wa Masu othene a Muluku yawo nyuwo munsuwel’anyu wira t’ekeekhai, ni nyuwo muntthuna ovonihiwa, kaaniikoha sinto mwaanvenxa ntata nanyu. Muvenxe ntata nanyu, “Pwiya, miyo kintthuna ovonihiwa.” Vaatepa oreera.

<sup>119</sup> Vano, mupwehe Nsu nno mmurimani mwanyu, “Miyo k’Apwiya kinvoniha iretta sanyu sothene.” Muupuwele, okathi Masu anlavuliw’aya, Awo ahana wiiraneya. Yesu oohimya, Marku 11:22, “Mwaireraru mwako ola, ‘Muthaamevo,’ muhihoveryaka mmurimani mw’anyu, masi mwaaminiki wira ele muhimmy’anyu enimwiiraneya, munookhalana ele muhimm’yanyu.”

<sup>120</sup> Vano, khula mmosa mwa enamun’awe vano, muuramihe muru anyu, mwiire olapa wanyu, “Pwiya, miyo kinnaamini Masu Anyu. Miyo kinniwa Nsu Nanyu nikileelaka wira Nyuwo mwa mmosaru nsana, olelo, ni mahiku othene.” Miyo kinrowa okhuruwa wira kimwiixatherye matata mwan’ola, okhala wira owo t’oyevaxa wira asuwele etthu eniiraneya, mwammiravo ooreerexa, oophiyaka munnuwelo ni iyakha sa Yosefe aka mwamukhani. Nto kintthuna othene anyu mukhale mulompaka, mulompaka, “Pwiya, miyo kinniwa Nsu Nanyu. Miyo kinnaamini.”

<sup>121</sup> Tithi a Wirimu, hiyo nniruuha muthukuman’ola wa Nyuwo wira avonihawe erutthu aya. Nto, Pwiya, va ori mwanamwane oohaawa, owo onniihana owiriyana waka okathi wothene mwa Mutthaka, kimoona tithi mmosa okilaathi va amuvarenle-ene mwammiravo. Mwa siensia a matothoro, khokhanle nroramelo wa mwammiravo owo. Nookhala Nsu nimosa na Muluku nnivira vasulu va itthu sothene. Nto ntoko ekereza ela yiitakanihaly’aya vamosa wira yiirihe khula yooruma miyo ensuwel’aka moota wo wira, ele enihala ti yawinyu Nyuwo, Tithi. Miyo kinookhuruwa ni omwiixatherya matata mwanamwan’ole.

<sup>122</sup> Tithi Muluku, mwa Nsina na Yesu Kristu, miyo kinnuulumela ela. Muhiye ikuru sa Muluku, ovoniha wa Muluku. . . Wira okhale ovirikana mwa yowo minutu mithanu sinttharelana. Wira awo othene arwe wa Muluku, mwa ovuwa Wanyu.

<sup>123</sup> Tithi a Wirimu, Nyuwo moonivaha natiri. Ti yeyo yothene miyo ensuwel’aka, Nyuwo moonivaha natiri. Eyo ehiiriwa, ntoko sihimmwaly’aya, “Nyuwo *mwahimeryaru* ila,” nto miyo kinimuuhimeerya khula xetwani a eretta wala muxankiho onitthuka muthukuman’ola, onaatthuka atthu ala, khula eroho y’ohaamini, miyo kinihimya wira, “Mukhume mw’atthuni, mwa Nsina na Yesu Kristu!” Vano, hiyo noosuwela wira yoolempwa, nto vano yoohimmwa, wira yiiriwe, mwa nttittimiho ni ovuwa wa Muluku. Ni mwa Nsina na Yesu Kristu ennivekeliba.

<sup>124</sup> Vano, nyuwo muniwerya wamini, ni munaamini, hata enikhumelela exeni, muhikhaleke ookhala, epyo yoomorela vale. Etthu ile yamukhani muhina mwa nyuwo, Nsu nne. Tithi a mwanamwan’ola, hata wira mukhalelo xeni onikhal’awe mwan’ola, nyuwo mwaamini wira epyo ya Muluku yoomorela mmurimani mw’anyu, wira mmiravo ole onookhala sana? Akina



wa nyuwo anoolompelana, mukina ni mukhw'awe, nyuwo munnaamini wira epyo ya Muluku yoomorela mmurimani mw'anyu, "eretta aka yoomalihiwa"? Vano mavekelo o wamini moovekeleliwa nyuwo, muuheelee nripu nno. Nto yakhala wira Satana onookhalakhala eereryaka, mutthike, "Keemenle-ene ekerexa ele y'oSpanya, Ettiminku ile vaasiisu, mavekelo o wamini kaahivekeleliwa. Ni Muluku oohimya!" Mavekelo o wamini anoowopola aretta ni Muluku onimwavenyiha. Eyo ehana wiiraneya. Nyuwo munnaamini yeyo? Mwiire, "Amen." [Muthukumano onira, "Amen."—Mol.] Muluku ooreeriheni. Vano kinrowa ohokoloxerya muteko wa Munna Rose, kinona wira va, Munna Jewel Rose.



*NSU NA MULUKU MAHIKU ALA OOKISERYA* EMK63-0120M  
(The Voice Of God In This Last Days)

Mutthak'ola wa Munna William Marrion Branham, opaceryawene olaleeriwe ni Ekelesi Ettiminku vaasiisu, mahiku yettaka 20 mweri wa Janeiro, 1963, Ekerexa Apostolika oPhoenix, Arizona, w'Amerika, okuxiwe wo okaravariwa mufitani ya makineti khulempwa wothene ni nttava na Ekelesi. Otaphuleliwa nno mw'Emakhuwani okumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)